

晚
晴
移
詩
匯

晚晴籀詩匯卷一百八十七目錄

閨秀

汪端 八首

張秀端 三首

何佩芬 九首

何佩玉 七首

何佩珠 一首

辛絲 六首

吳藻 四首

李心慧 一首

劉壽萱 十三首

袁綬 三十五首

張鳳 六首

張襄 四首

王允執 一首

高簫 二首

許學衛 一首

沈善寶 二首

項規章 三首

張友書 二首

張縉英 十首

張紉英 二首

張綸英 十六首

張紉英 二首

張鳳慧 四首

金蘭貞 五首

勞蓉君 二十二首

范薇 四首

巖曇雲 二首

齊祥棣 二首

趙景淑 十二首

沈惟 六首

張恩泳 七首

李敷娛 四十二首

翁端恩 五首

晚晴簃詩匯卷一百八十七

閨秀

徐世昌

汪端字允莊錢塘人同知陳裴之室有自然好學齋詩

集

詩話允莊年七歲賦春雪詩誦木元虛海賦庾子山
 哀江南賦兩過卽肯誦不遺一字其舅陳雲伯每舉
 史事之隱僻者問之輒應口對嘗取唐宋元明及國
 朝人詩閱一過輒棄去留青邱梅邨兩家而已又去
 吳曰梅邨濃而無骨不若青邱梅邨而有品及觀青邱
 以魏觀貽害而七子標榜成習牧齋歸愚選本推青邱
 陽而抑青邱大恨之誓翻詩壇冤案因選明詩初二
 集有論世知人之識以清蒼雅正爲宗一掃前後七
 子門徑於文成青邱清江孟載諸人表
 章尤力而於是非得失之故亦略具焉

孫節婦詩

節母程嬪于孫閱六載琴瑟敦夫天亡妾無子死從夫生
何恃墮樓不死神扶持投繯復被旁人知舅姑來向婦泣

兩叔未娶親髮白汝夫不幸歸黃泉汝宜代夫盡子職舅
姑言終婦淚流婦敢先死貽親憂良人地下姑少待此身
暫爲雙親留下撫兩叔上侍舅姑數年月照羅幃孤夫已
墓木拱妾亦淚眼枯嗟哉兩叔相繼歿舅姑心摧婦泣血
所遭竟如此天心詎可測鬻我嫁時釵開我鏤金箱爲翁
置妾延烝嘗叔生未幾翁姑亡孤嫠弔影增淒涼族中鬼
蜮憑陵久熒熒衰門妾獨守叔長娶婦婦舉男妾抱字之
夫有後晝荻丸熊心力瘁兒年十八游泮水兒游泮水母
心喜可見舅姑夫子矣六十八年完節身生固非生死非
死嗚呼立孤難死節易嬰與杵當年事處易不得迺處難
請看桐鄉節母茹茶志巾幗鬚眉固無異

秦溝粉黛磚硯歌

涇邑某氏藏古硯澄泥也紅白青
翠斑剝錯落若珠璣上有建業文

房印余忠宣銘注以爲秦阿房宮構宮人
傾粉澤脂水所成洵異物也紀之以詩

南唐硯山不可見人間猶賸南唐硯香姜銅雀久銷沈幻
出秦宮雲一片六國蛾眉競曉妝歌臺舞殿起阿房星燧
明鏡驪山遠漲膩凝脂渭水香四圍錯落珠璣細粉暈斑
斑黛痕翠臨波想見卷衣人玉姜豔逸文馨麗深鎖長門
卅六年魚膏銀海闕重泉御溝空照秦時月春水流花冷
暮煙楚人一炬悲焦土留得殘磚碧苔古建業文房好護
持鍾山小隱風流主金鏤應填絕妙詞新聲曾譜恨來遲
紅羅亭榭瑤光殿知付娥皇付保儀一行題跋忠宣筆昆
刀細劃龍山雪早春獨殿賦梅花不礙廣平心似鐵何處
香花識舊墩百年流轉到清門松煙寒滴蟾蜍淚蘭篆紅
銷蜥蜴魂秦臺未到吹簫處秦山尙有宮人墓澄心堂紙

玉管毫夜鏡還寫阿房賦

研北雜志袁伯長藏
有李後主玉管筆

翁大人得隙地於孤山爲菊香小青兩女士修墓並
建蘭因館其上爲夕陽花影樓樓左爲綠陰西閣
以祀小青右爲秋芳閣以祀菊香先是爲明女士
楊雲友修墓於智果寺因以祀祀徧徼海內題詠
哀爲蘭因集端亦賦四律

鄭家嬌婢解吟詩和靖風流想見之遺址誤尋高菊圃

在湖山便覽以菊香
墓爲高菊圃墓非也前身應是謝芳姿踏青春訪瓊姬墓

朱作培葉燮毛
稚黃皆曾訪之飛白宵題玉女牌諸九鼎
爲墓誌更乞茂漪書一

過簪花楷法妙臨池翁大人將乞曹墨琴夫
人書勒此詠菊香

其餘詩草返生香遺集眞應號斷腸齊國淑妣原著姓馮

蔣家小妹是同鄉人廣陵鏡湖桃葉鷗盟遠女弟紫雲歸姓
會稽馬鬣伯畫

閣梅花鶴夢涼屏居孤山別業最憶橫波暮小影眉樓一角寫斜

陽顧眉生會摹小影此詠小青

又見楊娃小印紅容華才筆麗驚鴻容華楊盈川女姪叢殘著錄

留湖上詩見張遜編輕薄嫵緣說意中李笠翁撰意中緣傳奇謬說也謝逸

畫圖寒翠晚謝彬嘗摹雲友及林天素小像汪倫潭水夜星空雲友在天素

明春星依然智果西頭路絕勝仙霞萬點楓雲友死天素乃歸閩中

草堂此詠雲友

碧城壇坵久名家多少蛾眉禮絳紗仙子玉壚三澗雪美

人湘管一枝花隔湖香塚秋飛蝶映水紅樓晚噪鴉更訪

吳宮雙玉墓牡丹廳畔竹陰斜翁大人近營瓊姬紫玉墓於虎邱塔院之牡丹廳下

瓊姬閩閩女亦名滕玉又作勝玉紫玉夫差女亦名小玉

畫蘭曲題梁溪女冠韻香畫蘭長卷韻香姓王名嶽蓮能詩文工小

楷善
畫蘭

清梵魚山夜月寒
松花如雨落仙壇
綺窗初試金壺墨
寫罷靈飛更畫蘭

瑤笙吹徹羽衣涼
瑟瑟微波夢碧湘
解爲幽花寫秋影
玉人原是杜蘭香

張秀端字蘭士番
禺人維屏次女錢
邦彥室有碧梧樓
詩詞鈔

銀漢

耿耿淡橫秋銀雲
影欲流至今傳渡
鵲終古隔牽牛
離思經年闊波光
入夜浮仙槎如可
汎天路接瀛洲

白燕

畫棟朱門計總非
玉樓寒盡見初歸
銜將絮雪營新壘
剪

得梨雲補舊衣月黑有時留素影春紅多處愛雙飛前身
恰是瑤臺謫王謝重來識亦稀

白雁

蘆汀飛雪岸生苔浪跡風塵亦可哀秋入嶺雲鄉信滯月
明湘水櫓聲來長門夢斷銀缸炮絕塞愁多白髮催欲把
羈懷傳尺素冰絃揮罷意徘徊

何佩芬字吟香歙縣人鹽知事秉棠次女范志全室有
綠筠閣詩鈔

奉懷家大人時轉餉入蜀

每憶長途苦誰憐蜀道難山頭孤月朗馬首片雲寒雁影
傳書至鐘聲響夢殘不如琴與劍猶得伴征鞍

冬日書懷

瘦盡年來影愁魔與病魔霜飛鴉背冷風急雁聲多紅樹
明殘照青山淡遶波無窮惆悵事搔首發長歌

虛窗納雲影清氣滿書帷敗葉無空響孤花有靜姿凍凝
蒼蘚徑寒到白鷗湄嘗盡酸辛味惟應曉鏡知

紅情

芳心一片總難知白白朱朱更繫思楊柳濃添今日恨桃
花瘦減去年姿蜂酣繁豔迷香國蝶戀餘妍繞玉墀底事
夕陽倍惆悵韶光又到送春時

綠意

惜花心事肯相捐繡幕低垂罨碧煙柳眼慵開愁脈脈蕉
心自結恨絲絲千絲織翠遮三面萬樹連雲蔭一天最是
重來難遣處枝頭梅子十分圓

秋海棠用漁洋山人秋柳四首韻

銷盡幽閨怨女魂和煙和雨映重門枝分翠黛秋無影淚
化紅冰鏡有痕漫道輕盈桃葉渡劇憐惆悵浣花村風姿
本是神仙品菊婢何堪共比論

嬌枝紅破一分霜不共芙蓉值野塘葉臥豈黏游客屐花
飛時撲美人箱丰神細寫題詞李豔麗翻憐出塞王知否
放翁顛未改尋秋重到碧雞坊

桃花雙頰映珠衣夢醒華清事已非三徑涼生鶯燕少一
庭香蘊蜨蜂稀夕陽屋角紅疑滴細雨牆根翠欲飛斜倚
畫闌嬌不語幽情應與世相違

綠肥紅瘦總堪憐淚灑胭脂欲化煙不占春光仍爛漫縱
無秋思也纏綿靜含清露剛三日豔絕西風又一年翻羨

紫薇高格好株株占得鳳池邊

何佩玉字琬碧歙縣人秉棠三女祝麒室有藕香館詩

鈔

春暮遣懷

多病惜慈親春寒費調護卅載齋鹽勞怡然甘守素兩鬢
早如霜雙眸半遮霧感此傷寸心無言倚庭樹

題常熟張孝女傳後

孝女心天上月萬古清光長不沒孝女顏雪中花千秋香
豔明於霞十齡失怙心如剖宛轉相依惟阿母屏除粉盞
與脂黛日侍茶鐫兼藥臼窈窕窗前守一經天然玉立秀
亭亭螺丸肯畫雙鸞碧閒煞虞峰入鏡青傳家雅有支機
石笑語承歡自朝夕不繡鴛鴦並鳳凰簪花小仿曹娥格

溫清辛勤二十年一朝母病痛難痊人間那有長生藥苦
乞參苓曉夜煎背人偷捲香羅袖欲倩肌膚延母壽空庭
悄立月無光對箭沈沈催玉漏瓠犀深嚙臂脂殷眼波迸
裂攢眉山一綫金刀飛白鍊血痕盡變桃花斑烹作羹湯
進母食繞牀忍著淒涼色豈知母病太沈綿百轉千回醫
不得生身恩重此身輕代死籲天天亦驚一瓣心香虔默
禱椎心欲泣不成聲悲鳴鵲鳥號風木戶外清霜折慈竹
白雲痛絕影迢迢愁對寢幃鐙暈綠香桃骨瘦不勝衣麥
粥微餐藥餌稀含笑隨親歸碧落雁行腸斷惜分飛芳名
真合標青史彤管傳來憑阿姊南國徒誇彼美人北宮不
數嬰兒子焚香讀處首先低今古何人可與齊惆悵琴河
寒食節女貞花發孝烏嘯

聽外話皋亭桃花之勝

春波浩蕩風泠泠扁舟結伴來皋亭閒鷗靜鷺解迎客蘭
橈直到花邊停一株秀而整穿雲蟠過青山頂一株豔而
嬌欹斜暗束青山腰日麗霞衣翻片片何處東風識人面
漫天匝地卷紅潮花耶峰耶都不辨一重花護一重山珊
瑚倒插翡翠環但愁封姨掃作臙脂雪勝游肯放金樽閒
望中紅白疎密向背不可數彷彿身入流水天台間千枝
萬枝迷處所山欲出雲花不許華鬢世界淨紅塵惟聽仙
禽空際語感君話舊向晴窗茶嫩香清蝶影雙游女如雲
花似海便思打槳泛春江

送外侍翁大人并子虔兄公入粵

當頭明月淡遙空折柳歌驪曲未終惜別本無兒女態聯

吟喜有父兄同裝輕半載詩書畫道遠還愁雨雪風十里
花田煙樹裏洋桃水碧佛桑紅

休嗟鳳泊與鸞飄一葉帆飛廿四橋舊夢已憐池草冷

詒庭

兄歿於嶺南迄今十載離魂拚共蠟花消鄉關日遠鴛鴦水海國煙

寒玳瑁潮料得情深非久別莫教再瘦到吟腰

晨昏須博老親歡嶺表風光任飽看丹荔綠榕堪入畫珠
蚶花蛤好加餐屈伸未免依人苦冷暝應知作客難珍重
臨歧無別語早將尺素報平安

不盡離愁宛轉思到時應在早春時滿籃香露花含笑一
路青山鳥畫眉得意何妨歸緩緩關心惟願去遲遲素馨
抹麗珠娘舫好譜風華絕妙詞

何佩珠字芷香歛縣人秉棠四女有瓊花閣詩鈔

問春

底事年年費送迎，回黃轉綠判枯榮。于人豈有炎涼意，入世何多旖旎情。未必易圓雙燕語，竟能催得百花生。漫天匝地紅無數，可是君才長養成。

辛絲字瑟嬋太原人有瘦雲館詩

華頂茅蓬遇女真，靜如自言百二十歲矣。

華頂訪茅蓬，銖衣颺晚風。煙霞浮磬外，日月貯壺中。藥採村姬碧，花簪酒姥紅。玉顏忘甲子，應是李騰空。

病後登小樓有感

小樓屈戌鎖孤煙，雁病蟲悽又幾年。秋冷蠨蛸行硯匣，夜深蝙蝠拂琴絃。水紋自漾書帷上，山翠仍橫鏡檻前。恐有茂陵遺藁在，殘篇重檢一淒然。

半野堂懷古

虞山蒼翠暮雲中一代聲華惜此翁
家國滄桑奈何帝文章細碎可憐蟲
功名庾信空多感詩品鍾嶸亦未公
兒女英雄要遭際蛾眉可惜柳河東

題鷗波夫人碧城摘句圖

明珠作佩玉爲臺錦字迴文妙剪裁
春到牡丹纔國色人言太白是仙才
定知燕寢焚香坐如見鸞岡寫韻來
我是碧城詩弟子焚香一讀一徘徊

桃花嶺遇雨

緩緩香車渡嶺行四山紅雨下無聲
夕陽影上春衫薄身在桃花嶺上行

溪邊茅屋兩三家雙髻村娃解煮茶
幾片溼雲松樹頂吹

來雨點半桃花

吳藻字蘋香錢塘人有花簾書屋詩詞

詩話蘋香初好讀詞曲後肆力於詩治家事外手執一卷興至輒吟父夫俱業賈兩家無一讀書者而獨

見秀異苑有夙慧

青黛湖上弔吳宮雙玉祠墓雙玉者闔閭女勝玉夫
差女紫玉也墓久失陳頤道先生爲營抔土鶴欄
之西并建祠塑像勒文於石青黛湖虎邱後山湖
名當卽女墳湖也

湖中水暝魚吹絮湖邊花發鶯囀樹吳宮花草久成塵瞥
見吳宮雙玉墓雙玉復雙玉玉貌皆嬋媢白鶴解舞影化
煙各有冤憤沈黃泉才人解惜嬋娟子瘞玉埋香訪遺趾
繡襦甲帳寫真形如向黃泉重喚起君不見玉波蕩漾雙

蓮冷當年隊長無留影又不見施夷光鄭修明館娃宮圮
屨廊盡蘇臺空有苔花生玉人如玉年嬌小爭似婷婷雙
玉好離騷哀怨爲招魂應有碧雲來縹緲雀扇銖衣好畫
圖千秋金粉重三吳回首蘭因弔花影黛湖何似美人湖
秋雪漁莊

蘆絮明寒渚松陰暗草堂西溪好煙水中有此漁莊築齋
營鷗宅分田種鶴糧梅花三百樹晴雪又浮香

龍井道中

一徑風篁路幽泉響石磯竹林秋筍瘦苔磴晚花肥掠雨
紅蜻下衝煙翠羽飛松花香冉冉還復點羅衣

翠涿園

雲滿樓臺水滿津闌干十二碧城春隆中風月眞名士林

下煙霞彼美人卧砌苔碑昏柳是隔湖花樹暝蘭因輞川
儻問王摩詰金粟如來是後身

李心慧桐鄉人休甯陽江知縣金孝繼室

輓馮枯堂中丞筵室俞孺人

待節湘南又皖公髡髦截耳柏舟風百年漆室鍼神課四
世朱門保母功側葉慣經霜雪勁鉛華還屏珥瑜充而今
皓首歸泉壤留得芳名字宙中

劉壽萱武進人江陰繆徵甲室有夢蟾樓遺棄

詩話壽萱歸繆氏後食貧習苦事祖姑君姑克盡婦
職徵甲字布廬有寄內詩云局踣鴉鴉寄一枝貧家
門戶賴卿持老親奉薄餐須早稚子衣寒睡莫遲兩
夜斷薪愁爨火霜晨汲水裂凝脂更餘蓮負當殘臘
蓋篋搜羅強自支終窶無聞交謫聲寒宵借和憶深
更才能蘊藉方爲福詩到奇窮轉更清年過老泉頻
誠我世無德唯定推卿祇憐林
下長飢鶴不及朝陽采鳳鳴

白頭吟

新花開故枝舊花落多時
郎个勿娛嬉聽妾前致辭
妾爲郎後婦恃愛忘妾醜
郎心眞妾懷妾心印郎口
東市買明珠南市買羅襦
西市買美酒北市買銀鱸
膏澤面膚悅衣食信無缺
長跪問前妻請郎一一說
前妻來歸日值郎貧賤時
無薪炊屢屢無粟朝忍飢
畜妾今日富忘郎昔日貧
豈惟忘昔貧并忘舊時人
舊人爲郎死死後幸有子
勸郎續絃膠家事須料理
瀕危執郎手惜此呱呱兒
棄置在後人生死從郎爲
妾身赴泉壤妾魂守家門
孤兒眼中血新人掌中痕
郎言聽未終新婦聲暗吞
結髮尙寡恩新婚何足論
願移愛妾意先慰泉下魂

昭君歎

明妃生長荆門時布裙照耀傾城姿心高不肯厮養嫁年
少常期天子知漢家天子勤宵旰後宮佳麗無心玩單于
歲入雁門關羽檄紛馳常待旦待旦何人侍至尊三千宮
女競承恩深宮一入如長夜鏡裏朱顏祇淚痕淚痕終日
對東風月落烏嗁朝暮中春光不管垂楊碧秋雨誰題落
葉紅千金恥買相如賦况肯低眉暗行賂畫工能竊太阿
權顛倒妍媸君勿顧贏得烏孫下嫁名君王慘淡在臨行
早知我見猶憐汝卻恨圖窮已誤卿卿辭漢殿向黃沙回
首長安不見家淒絕城頭吹筆策愁來馬上撥琵琶琵琶
幽怨分明語碧眼胡兒淚如雨八月邊風愁殺人雪花如
掌當風舞薄命紅顏敢自傷死留青塚土遺香上林驗取
南飛雁一紙還憑報漢皇

望行人

登樓望山山不斷山外有天不許看何當五丁力開山青
天盡置眉嫵閒眉嫵閒無復舊朱顏朱顏容易老行人何
日到

征馬嘶

邊塞草枯處將軍乍列營駑駘甘戀棧騏驥願從征戰死
骨難朽生還功已成超騰千里志不作別離聲

古藤書屋弔東坡先生

建中靖國元年坡公自海外歸乞居常州寓願鼎橋孫氏

宅以是年七月卒今方氏古藤書屋卽孫氏宅也七百年來不知更幾主人矣

端明會小住宅在水雲湄儻耳頻年滿峩眉故國思乾坤
窮此老烏鵲弔空枝月下重相訪藤蘿似古時

過青山莊故址

甌北集青山莊歌有盡寢香消空堂氣冷之句當日莊雖入官寢堂尚在

也今則鞠爲菜園漸成墓地
以視甌北賦詩時又何如也

荒莊變墓田人指舊平泉卽此流螢徑曾開射鳴筵花神

無片土

見甌北集

園戶絕多年興廢非天意方知疏傅賢

苦寒

欲雪不得雪寒風徹骨侵擁衾成潑水惜火勝兼金瓶膽
無端裂蕉心何處尋鴛鴦餘半幅凍指畏拈鍼

哭從妹佩荃

妹以家貧幼畜於同里張年十二張翁
卽聘爲子貽謀室年十七成婚十九貽

謀以察亡妹持喪及期暴卒姑老
且病無子爲存一詩以俟採風者

幼作出巢雛中途鳳又孤早知生薄命決計死從夫堂上
孀姑在衰年兩淚枯旌門他日事泉下也知無

病中

幾番伏枕思茫茫此病空將藥餌嘗哭子怕看雛燕壘思

親曉斷乳鴉腸蠶僵苦被千絲縛鶴瘦惟餘一頸長聽盡
階前秋夜雨五更燈火亦無光

寄外

勞能生善古人思夙奉曹家作女師績紡夜深頻顧影窗
掃天曙早拏帷蒼苔未掃三三徑綠萼能開九九時荆布
自甘恬淡意敢因柳色感春遲

偶成

有書意難盡無夢心轉安悟徹維摩理初生月似殘

春去

游絲和絮亂嗁鳥戀花稀長晝原如昨春從何處歸

古意

蘇武雪中甌李陵臺上月河梁送別時知心未知骨

袁綬字紫卿錢塘人枚女孫河內知縣通女江甯諸生

南平知縣吳國俊室懷安知縣師郊道光甲辰舉人

榆次知縣師祁福建縣丞師曾母有瑤華閣詩詞集

詩話隨園諸女孫並耽風雅瑤華詩詞尤工在室時與諸弟妹聯詠無虛日歸吳氏極夫婦唱和之樂其詩原本性靈意無不達而讀史有識治家有規皆可於詩中見之晚歲自言少作無存中年吟藁亦多散失今所存者殆十不及一焉

游雞籠山懷古

瓊樹歌殘壁月遙
閒尋故碣認南朝
草埋智井臙脂冷
蘿繞荒亭雉兔驕
湖鏡幾窺紅粉倩
山眉猶學黛蛾嬌
臨春結綺知何處
潮落空江恨未消

依舊秦淮繞郭流
珍珠河轉接荒邱
千村萬戶環雲腳
疊嶂層巒擁石頭
複道記曾迴玉輦
臺城可更護金甌
我來

憑弔斜陽裏煙靄蒼茫起暮愁

詠史

亡虜歸來思報復卧薪嘗膽是英雄五湖一棹煙波闊如
此功臣竟善終

四皓安劉非助呂戚姬空自淚縱橫若教如意爲天子未
必能如孝惠明

壯髮初離宮女腹緣絛收去使人疑當時庸主昏難及自
殺嬌兒媚寵姬

餘蔭成功何足羨汾陽七子有誰賢一軍盡甲存何意驕
語還爭貴主前

明樂安公主玉印圖

樂安公主光宗女身出天潢貴無比勅書下降選才人都

尉翩翩似蕭史簫合秦樓琴瑟歡金蓮燭下任人看天錢
撒帳春如海玉女乘鸞佳遇難金枝生小耽文翰異書賜
出憑珍玩錦軸牙籤萬卷橫簪花格妙詞章絢小印玲瓏
玉色融雲雷紋細篆來工畫眉窗下攤書坐素手親鈐一
顆紅百年佳偶人爭羨雙修福慧神仙眷不識人間兒女
愁那知世上滄桑變罡風忽起委瓊花一夕瑤清返鈿車
彩雲易向秋空散都尉神傷鬢欲華總幃虛掩人何處長
簾空牀愁日暮想像音容入夢難禪心已逐空花悟一朝
流寇犯神京九廟煙塵帝主驚鼎湖龍去乾坤破獨木難
支大廈傾精忠都尉肝腸裂媧皇難補金甌缺兒女親看
縛柱焚冠裳書畫從灰滅揭天鼙鼓震京師國破家亡恨
莫支身留一劍酬君德名播千秋答主知九原相見應含

笑報國捐軀臣節耀不愧天嫵有幾人成佛生天遣逆料
此印流傳二百年閩房雅尙想從前可憐玉石無情物不
管興亡色皎然

養蠶曲

雞鳴喔喔女兒起起視蠶桑銜影裏一重綠葉萬蠶眠
蜿而吐絲纏繅今春喜說蠶成熟不向三姑夜深卜結成
芳繭忘辛勞銀鐙煮出手自縲月中皎若冰絲白干絲萬
絲機中織織成鴛鴦錦匹匹加顏色爲君裁作襦君無寒
冷妾心娛爲君裁作被覆君温煥妾心慰妾思君君不知
請君但看襦上絲妾望君君未曉請君但看襦上鳥他生
不願作神仙願化鸚鵡西海老

秋興

離懷何處放吟眺晚風前涼月淡無色秋花瘦可憐碧雲
千里合錦字幾人傳漫挹浮邱袖閒身不羨仙

薄暮登倉山

好山誰蠟屐煙景望中佳嵐翠欲眩目白雲常入懷幽泉
漱危石冷月挂懸厓歸路松林暝藤蘿冑鳳釵

夜讀示兩兒

男兒立志初所貴乃孝弟讀書啟其蒙豈爲博金紫事君
如事親忠臣必孝子治國如治家循吏必悌弟爾曹中人
姿習俗易移徙日讀聖賢書自然識大體爾祖少食貧筆
耕貰薪米拔萃舉明經一甌爲貧仕賢良擢令尹循聲著
遐邇五十歸道山宦囊清若水汝父少失怙孤立鮮依倚
獨木支大廈恐墜箕裘美好學寡交遊一編惜寸晷平生

重然諾所爲慎終始家貧食指繁菽水無可恃飢來驅其
行負米長安市近跡依我翁幕游恆自恥來歲試北闈但
願魚燒尾揚名卽顯親文章有知己嗟我出名闕頗亦習
詩禮結襦歸汝父并曰躬料理大母髮垂白所樂在甘旨
羹湯洗手調終歲懼毀訾爾父昨來書問爾近何似青燈
舊有味慎無惜穉齒嬉戲徒自棄歲月去若駛何時方成
人慰我願復喜未寒衣先裁未飢食先俟典釵供脩脯和
丸偕卧起棗梨莫攘奪手目共指視新詩當座銘高山試
仰止

偶見

綠筠深護小池臺一樹紅梨倚檻開簾影漾花浮荇藻誤
他雙燕掠波來

聞香雪海中梅花尙無消息詩以催之

竹外欄前萬樹梅尙無一朵向南開
難邀玉戲酬吟筆想對明妝勸酒杯
獼髓乍敷紅暈淺
蚪枝漸聳綠房堆
衝寒未放春消息
擬倩東君羯鼓催

倉山牡丹盛開家嬪母招飲卽席感賦

陽春百花發
鼠姑擅盛名
今春雨水遲
三月方含英
嫣然倚東風
解語真傾城
主人開瓊筵
邀客吹金笙
行樂貴及時
相與各盡觥
長歌發慷慨
所愁節序更
年時攜手伴
落如晨星
骨肉多遠別
踽踽難爲情
身遙心自近
夢想通精誠
豈無魚與雁
柰此千里程
溫涼敘片紙
離懷難盡傾
歲月日以去
憂思日以盈
願附飛鴻翮
乘風以北征

孟夏飲芍藥花下

丈夫貴樹立其志在功名女子不出戶長年無所營中饋
事粗了鍼綫須調停薄暮得暫息閑吟豁幽情是時四月
天山深聞晚鶯芍藥開較遲紅芳殿春英花下具杯杓獨
酌還獨傾三杯樂陶然氣爽心亦清憑高豁遠目疊嶂青
冥冥地偏絕市囂寺近聞鐘聲中懷自蕭曠淡泊無牽縈

送又村仲弟赴試北關

去年此日君甫歸木葉落盡霜雪飛風塵未敢瘁顏色比
貌略較年時肥手足由來有天性譏巧翻笑蒼蠅非家庭
巨細同會計心跡如一無相違名園茅舍距咫尺三日不
見忘朝飢有時歸甯具尊俎捧觴上壽娛慈闈鐙窗茗話
聚同志漏盡不覺星河稀銷寒雅集記客歲矜奇鬪巧分
新題人生此樂豈易得况復努力功名時驪駒在門酒在

地耳集卷之十一
三

蓋行李復發心先馳願君科第如拾芥青雲直上符心期
風霜載途善自衛道遠莫使音書遲十年有約慎無忘錦
衣萊服同光輝

出山留別

別母牽衣感隨卽遠宦情白雲千里隔華髮一時生願祝
萱常茂遷期草並榮蓬窗今夜夢定繞石頭城

弱弟心如一相依又十年長貧慣彈鋏小別亦傳箋菽水
同商略芸編莫棄捐家聲懼中落盼爾繼前賢

束髮尤相契同根姊妹花卅年榮瘁判幾輩世情嗟白水
盟心跡青雲感歲華春來宴桃李應念落天涯

嬌女初離膝邗江白下分溫涼調乳襍燈火伴辛勤婦德
宜相勗夫憐想更殷他時遂初賦饁餉助耕耘

庚子冬赴閩途中與伯鍊夫子同作兼憶倉山梅花
我本餐霞人冲襟愛山水時平恨不櫓碌碌守鄉梓君沾
微祿適閩越我始同來醉江月高掛蒲帆趁順風回頭倏
過千芙蓉望夫石遠疑人立目斷歸舟龍骨出萬古難銷
是此情江聲日夜疑鳴咽金焦兩點風利不得到只恐煙
蘿暗騰笑古杭五日留西湖慳一游毋乃愛惜費雨雪風
颼颼錢塘復上江山船船頭少女呼同年江湖也作廊廟
想不用文光射斗象明眸皓齒竟虛名水佩風裳空想像
浙西山水天下奇竭來可惜窮冬時層巒疊嶂睡未醒不
關明妝懶畫眉灘河水清石子多篙師涉險相喧呼水船
輕捷大船笨瞥眼已過疑飛鳧冰斲雪淨天地蕭撥掉空
江皴寒綠篷窗煮酒妥吟魂手寫新詩屬君續忽憶倉山

萬樹花寒香冷豔粉橫斜羅浮夢好不歸去鶴守南枝應
怨嗟

桐江舟次憶倉山同人

故園何處是雲樹思依依歲晚鷗盟冷潮寒鯉信稀灘聲
喧水碓帆影掠魚磯繫纜荒村近含情倚夕暉

釣臺

北風忽捲山雨來繫纜不果登高臺先生高尙隱不出垂
竿獨釣空江碧詔書物色聘書徵五月披裘人易識故人
轉忘天子尊足加腹上驚星辰先生高卧帝不悅子竟不
肯爲我屈當時求賢如此誠先生釣魚兼釣名先生不出
臺不圯萬古千秋名著矣

秋日與大兒話舊

有生憂患始何況困長貧詎短英雄氣偏疏骨肉親誰貽
千日酒醉過百年春莫歎朱顏改愁多白髮新

南平舟次

西風吹雨滿天飛霧幕遙山碧四圍買得扁舟仍作客可
堪佳節未成歸月宮舊夢沈清角水國新涼換袷衣只恐
姮娥暗相笑有人四牡正駢駢

撫州舟行

曲曲溪山儼畫屏秋高氣爽好揚舲幾家茅屋依青嶂一
簇蒲帆出綠汀雲碓響春流水急風鴛低冑落霞停柳陰
陰裏推篷坐幽鳥相呼隔樹聽

時事

兩載夷氛擾連營海上難鐵衣霜月冷金柝曉風酸不戰

軍民遁無功將相慙妖星猶閃爍露布幾時看

寄梅竹卿表妹

涉世如虛舟飄飄隨長風
塌來聚閩海境遇將毋同
同爲出岫雲同作隨陽鳥
旣忝葭莩親復結苔岑好
昔人重交誼高義仰雷陳
生世恨不櫛苦樂恒由人多
君薄時趨慷慨制侵辱豈徒愧
鬚眉兼可振薄俗凶頑苟能化
田氏榮紫荆但愁下愚質久漸
故志萌治家不貴寬恩多生妄想
所以先聖言小人最難養孤琴海上
彈謬蒙知音賞何日結比鄰
晨夕數來往朱絃靜愔愔落葉鳴
撼撼霜警夜烏噉魚跳池水活
此時一尊酒斟酌誰與同舉頭望
天末煙靄相溟濛美人期不來
寒月何噉噉下階倚修竹願影空
徘徊夜深還入閣燈燼和煙落
月亦如慰情流光照羅幕

京江晚泊

繫纜江干正長潮荻蘆風起晚蕭蕭
人才有數傳千古山水無情送六朝
鐵甕城荒斜照冷金陵氣王陣雲銷
霸圖憑弔空陳跡烏鵲寒聲答麗譙

南山

南山有古柏高出青雲端根固葉自茂
何懼霜雪寒幸無大匠知免被斧斤殘
華屋有時傾棟梁難獨完不如守本性
凌寒壽千年

東城

東城桃李花灼灼矜芳姿會蒙春陽煦
爛縵開及時東皇欲返駕風雨旋相欺
蜂蝶候已散月明嗟空枝小草任天倪
翻得常華滋

接少蘭弟蜀中書感賦

一紙家書百感生宦游人負杜鵑聲廿年未遂慈幃養萬里輕分手足情粟里有田堪守拙桃源無地可歸耕流光坐惜堂堂去何日鄉園畫錦行

得又村仲弟上海殉難訃音詩以哭之

半載家書滯錦鱗慘聞凶耗走驚魂竟殉職守完臣節敢棄城亡負國恩皓首慈親逃白刃青年少婦哭黃昏天涯有姊空腸斷北望停雲積淚痕

五樹荆花賸四枝

仲姊早故

宦游常恨會難期詎知昔歲分飛

日便是今生永訣時泡影隙光真夢幻生離死別更淒其千戈滿地家何在化鶴還山定益悲

痛亟還思未別前小倉山下好林泉坐來花月供吟醉行

處樓臺聽管絃離緒忽縈千萬縷鄉心已折十三年故園
慘被黃巾陷何日招魂葬墓田

張鳳字含珍號蒹葭女史平湖人誠女高蘭曾室

詩話含珍嗜詩家事少暇卽取古人詩集與兒女輩
相攷論性復愛花時當病劇有貽以花者必奉雌流
盼低徊久之其從兄贈以詩有但須靜對養天和
和見花勿令詩思觸之句及歿家人見花率泣

和夫子行天竺山中次韻

筍輿游天竺一徑入深曲初日淡高林苔色萋以綠山鳥
向人鳴梵音旋相續我來塵俗中物情互起伏殊觀得未
有身心增謹肅寒濤捲長松微風響幽竹徘徊坐石根流
泉咽虛谷言歸興未闌回首雲迷麓遙指半山人行傍
古木

擬孟浩然夏日南亭懷辛大

日夕雨初過閒亭敞幽景結廬遠人村松月共清冷竹風
生夜涼池荷瀉疏影仰觀天宇澄雲路一何永悵然念古
人此心徒耿耿

陳山觀海歌

岡巒一帶明殘陽林花掩映春風香筍輿得得忘路長九
峯遙障波汪洋陳山帆岬臨中央振衣直上登高岡海天
渺渺雲水黃陡然突起溝頭狂海風吹水勢莫當憑空壁
立千丈強馮夷擊鼓魚龍翔銀樓十二隨飛揚仰觀俯矚
何茫茫須臾捧出玻璃光白波萬頃搖扶桑蜃樓鮫室爭
輝煌潮平忽見遙山蒼數峯若與船低昂吁嗟乎潮汐往
來那可測安得假我凌風翼飛向瀛洲問消息

寒郊

歲晚百端集寒郊生遠心晴煙明野寺旭日冷松林雲樹
極空淨川原入望深關荆善圖畫會向此中尋

自玉換山房步從渺滄湫春望嬰山之作

春到山光媚嫣然笑靨留鶯嘯空谷暝泉挾落花流石徑
松杉茂書堂竹木幽東風不解事吹破綠煙浮

閒坐

西風料峭暮雲高松蔭蒼茫起翠濤涼月一庭誰共語紙
窗閒坐讀離騷

張襄字雲裳一字蔚卿蒙城人游擊殿華女有支機石

室詩錦槎軒集

詩話蔚卿生自將門凡詩詞書畫音律無不精研旁
及韜鈴騎射亦所講習年十七割股療父疾嘗和青
邱梅花詩九
首傳誦一時

登靈巖山

勝地甲三吳風雲想霸圖綺羅西子徑煙雨范公湖故苑
悲麋鹿空林響鷓鴣登臨無限意落日下平蕪

題看山讀畫樓

一路風光引登樓喜欲仙青山人讀畫翠竹客參禪雨氣
奔頽壁雷聲吼怒泉故鄉何處是遙指白雲邊

丙戌春日侍太夫人鄧尉探梅徧歷銅坑香雪海諸

勝太夫人命賦梅花用高青邱韻呈九首

選二

探奇何必萬峰臺茅屋疎籬處處栽林外亂鴉衝雪去山
中孤鶴破煙來新枝爛縵攢紅蕊古榦杈枒點綠苔竹外
一枝看更好橫斜多傍夕陽開

千樹琪花繞梵宮羅浮原與碧天通多生福慧雙修得六

代鉛華一洗空詩在灞橋驢背上曲留關塞角聲中笑他無限癡兒女但識人間錦繡叢

王允執字舜華號散花女史嘉善人焉飛女曹錫祺室

白隄步月

琉璃世界許盤桓一曲瓊簫露影團行轉長隄回首望樓臺高浸水雲寒

高簫元和人舉人朱綬室有繡篋小集

詩話淵筭夫婦能詩其表章懿行及詠古之作皆有真理

春日吟

去年春風花滿墀抱病孤負花前卮一年惆悵掉頭過今年又值花開時庭花對我有憐意爛縵似發含春姿春來兮何處春去兮何之去何速兮來何遲飛花一夜颺春夢

杜鵑嗟爾噓空枝

春來

春來何處最關情一半垂楊一半鶯不定曉煙空鎖恨易
闌殘夢慣聞聲草飛蝴蝶愁千里風冷棠梨月二更欲把
相思寄流水小樓深夜坐調笙

許學衛字蘭漪錢塘人吳縣諸生周以豐室有鬘花小
草

詠梅和外

園林半樹衝寒早桃李三春鬪格難雪後添肥月前瘦山
中相憶水邊看仙標出世應稱絕風味如君未去酸最愛
黃昏暗香動好攜尊酒佐清歡

沈善寶字湘珮錢塘人吏部郎中武陵雲繼室有鴻雪

樓詩集

壽光除夕

行盡山程與水程故鄉風景已全更
一年又向今宵盡萬感都從此夕生
悵望白雲遲雁字燒殘紅燭聽雞聲
游秦季子裘空做倍覺文通賦有情

夜過塘栖

挂席塘栖路離鄉第一程涼風吹袂薄
孤月向人明燈火高堂夢煙波旅客情
吟成誰與和村柝正三更

項親章一名紉字屏山號親卿錢塘人
吏部尙書諡文恪許乃普繼室有翰墨和
鳴館集

題梧桐落葉便面

容易秋風感客心蕭蕭木葉下疏林
從今一任泥塗辱忘

卻炎天借綠陰

題畫竹

年時避暑憶江鄉爲愛蕭蕭竹一牆今日移栽紈扇上無風無雨自生涼

雁來紅

已著西風又著霜耐寒猶作女兒妝瀟湘雲水人何處草草題紅字一行

張友書字靜宜丹徒人拔貢候選訓導陳宗起室有倚雲閣詩存

新秋微雨入夜月光皎然有懷蘭仙母女

遠樹蟬響寂一雨生微涼美人隔秋水共此明月光月光空復明相思苦難已聽盡漏聲長悄然立花底

長男秋闈獲雋感賦

屢雪劉蕢涕今朝暫展眉未堪酬汝志差可慰吾衰兵燹
餘生在風雲後日期莫忘忠孝意努力壯門楣

張縉英字孟緹陽湖人知縣琦長女主事吳廷鈺室有
澹鞠軒集

包煥伯曰縉青幽雋婉綢排累若綺和雅各得先生
之一體恭人則縉綿悱惻不失於思屬詞此事必達
其志及近體詩吳仲倫曰澹鞠軒五古大有黃初之風七古
難得宛鄰四女皆能詩而孟緹工
力尤至知有得於庭授者深矣

留別弟妹

聚首旣云樂每憂分手時分手忽在卽離思何可支堂上
白髮親容顏日以衰大人雖強飯辛苦獨自持慈母况抱
病常藉藥餌資荏苒卅八年骨肉長相隨一旦欲睽隔戀

戀不忍辭視彼投林鳥回翔繞故枝嗟余獨遠行何日重
牽衣舉頭見明月啞啞慈烏嘯溪流爲嗚咽花影亦離披
弟妹設酒筵殷勤勸一卮舉醞屬弟妹揮淚重致詞游子
日以遠親心日以悲承歡慎朝夕步履謹持維親身日以
康子心日以夷千里雖去遠魂夢常相依丁甯再三屬不
必問歸期努力事高堂慎莫說相思

古劍

百戰雄心在千秋寶氣揚風霜凝慘色神鬼泣寒芒電掣
青鋒冷虹橫碧落長良才未淪沒光彩識干將

夜夢還家

夢裏關山近休歌行路難五更頻涉遠千里獨衝寒繞膝
仍相聚牽衣不盡歡鐘聲忽驚斷欹枕淚闌干

婉紉妹將有山右之行作此贈之

絕壁幾千尺名山憶太行嗟予當遠道賴汝慰高堂那更
重分手相看欲斷腸誰憐雙鬢影一半點秋霜

自館陶入都舟行雜詠

薄暮消殘暑扁舟路漸賒河聲催落日野色點明霞岸曲
林容黯風回楫影斜沈憂銷未得憑眺獨咨嗟

一片長河水蒼茫接遠天我來經幾度繫纜綠楊邊野鳥
煙中沒孤帆樹杪懸星光雜漁火迢遞滿前川

客行時已久離思入斜曛木落烏啼樹風高雁入雲人家
依岸仄雞犬隔籬聞指點西山近浮巒淨翠雲

偶成

墮溷飄茵遇各殊難憑巧拙判榮枯可憐絕豔天孫錦盡

作障泥不作襦

傾城何必盡名姝月籠花模總過諛此意深知惟宋玉高唐賦後賦登徒

寄若綺妹卽壽四十初度兼示婉紉妹仲遠弟

吾家弱妹已四十怪底吾衰鬢蕭瑟半生舊事付雲煙歲月駸駸去何急憶昔垂髫侍親側四女娟娟最珍惜名花入檻盡駢枝嬌鳥能言皆比翼我年十四好讀書一編相與時伊唔讀書常苦識字少索解不得心煩紆是時家貧乏衣食窮巷蕭條鮮行跡嚴君挾策事壯游慈母持門瘁心力午炊曉汲未覺勞得暇便欲拈柔毫就中三妹最精銳晝日苦短常終宵我長頻年苦多病經月連旬廢妝鏡書卷縱橫列枕衾病裏耽吟覺心淨妹年最稚性尤敏漱

玉含珠出靈性五齡解辯黃花詩十歲能工海棠詠深閨
窈窕春日長輭塵不到瑤琴旁詩懷杳杳入霄漢幽夢瑟
瑟飛瀟湘身世渾忘溷塵俗羅綺何榮脂粉辱班宋長懷
絕代才施嬙空陋千秋目轉眼倥傯人事勞告歸最苦烏
辭巢六年秦館猶聯袂一去燕臺慨繫匏哀樂中年苦相
逼雁斷烏嗁劇悽惻惡劫偏多兒女魔終天莫報劬勞德
虞淵墮日不可探我處塞北君江南消沈心志各已久我
困米鹽君井曰郎署委蛇守一官故鄉迢遞無千畝率蘿
補屋願已遲羨爾偕隱猶聯枝清貧絕稱孟光志比屋好
詠靈均辭矯矯譚公振時器妹婿太倉王季旭曠骨性清醇似吾弟
身外升沈未足論塵中契合嗟何易卽今燕婉和且平參
昂肅肅瑤光明佳兒嬌女各爭秀相對便足怡吾情人生

行樂苦不足况乃襟期厭庸福得失尋常付一人榮華變
幻紛干族蘭陵三月東風香櫻筍味美瓊筵張弟歸千里
姊同舍長歌短倡傾壺觴我望江鄉欲飛至夢裏雲山寄
遐思萬緒俄生九折腸卅年最憶童時事願祝西池錫大
年相將訂我玉臺編漢家十志長生籙劉氏全書不老丹
太息吾衰事難竟簡策叢殘多未定考俗思陳列國風無
邪欲正中閨行闕內非憑文字傳少時艱苦亦堪憐百齡
擾擾終何補一世悠悠未足言我倡新詩爲子壽夙志應
須早成就他日編書集一門白頭重與繩愆謬

張紉英字緯青陽湖人琦次女江陰章政平室有緯青

遺藁

誌夢

鄉關望不極，離別日已久。不盡倚閭情，空餘淚盈袖。東風
滯歸鴻，離思苦相逗。颯颯北窗風，迢迢水添漏。輾轉不成
眠，遙夜長如晝。霜天鳴杜宇，淡月下窗牖。虹橋在何許，縹
緲不能渡。嫦娥憐寂寞，指點虛無路。朦朧雲霧起，倏忽百
餘里。不聞風濤聲，歸心靜如水。扶桑標旭日，浮霞散羅綺。
迴看半掩扉，依舊蒼筤篔。裏繡闥，尙依稀。屏開篆縷微，簾櫳
鸚鵡報阿弟，笑牽衣。連袂趁瑤砌，承歡出錦幃。芻尼晨報
喜，鐙蕊夜懸輝。寒梅香乍坼，話雨西窗夕。新茗淪龍團，瓊
芝泛蒼柏。日暝畫堂前，飛觴醉綺筵。椿萱同介壽，姊妹各
披箋。酒酣攜紫佩，飛花點衣袂。散步下階墀，風細鳥聲碎。
草色漾新痕，松風拂深翠。流連心神怡，此樂不可再。雲煙
倏渺渺，驚雷墮天表。肅然動魂魄，曙色橫窗曉。鄉國杳何

之帳冷殘燈小似聞慈母語絮絮猶未了

納涼

一白月光滿蒼簑疎影橫花欹香鬢薄露裊葛衣輕蛩語
迎風急螢飄點水明小窗簾半捲銀漢望盈盈

張綸英字婉紉陽湖人琦三女同縣諸生孫劼室有緣

槐書屋集

詩話婉紉體弱若不勝衣而作書由北碑上湖西晉
歸宿於漢剛健沈毅不可控制爲二三寸正書神采
奕奕端嚴適麗爲分書格勢峭逸筆力沈厚旬晨起
作書數百字乃啟戶理妝或閉戶就寢盡數百字乃
卧嘗中夜不寢輒起臨池家人勸少休曰吾一日不
作書若有所失欲罷不能矣中年始爲詩不苟作長
於五言神似陶謝

題雲峯山鄭道昭石刻

巍巍雲峯山千仞不可極猿猴愁攀援飛鳥苦難越壯哉

鄭將軍振衣造雲闕峭壁恣濡翰雲崖留真蹟怒濤腕底
生迅雷筆端出颯颯龍蛇飛矯矯鸞鳳活字蘊天地精墨
灑山川澤妍姿悅仙靈剛鋒驚鬼物深淳李程規堅勁鍾
張骨煙霞常呵護風雨不敢蝕千載仰遺型神采猶奕奕
斯山藉公靈海內憑研習愧我性庸愚臨摹空彷彿展卷
每流連抗懷長歎息

送孟緹姊之京師

涼風動高梧哀蛩響幽咽欹枕不成眠攬衣長歎息瞻彼
連枝樹龍蔥經歲月視彼林間鳥衆雛長比翼嗟我雁行
違迢遙望冀北再拜送君行欲語心戚戚憶昔別姊時迴
腸幾碎裂馳驅二三載神魂日飛越幸得重聚會承歡兩
無極倏忽數年間又當遠離別離別復何言泣涕沾胸臆

君今六翮振翱翔自安適而我若梁燕秋至催歸急焉能
避風塵穩住雕檐側身世等浮雲勞逸詎能測自今一揮
手何時見顏色努力慰親心此軀保金石

雜詩

寒暄倏代序日月遞盈缺黃鳥鳴北林芳華恣欣悅暄飈
盪愁心輕霜變華髮南園桃李樹纍纍多結實嗟我蘭蕙
花芳馨坐銷歇涉江復何慕攬佩不忍結百草非不芳庭
樹日蕭瑟感物增惋傷沈憂轉悽咽

貧交行

貧交無厚薄窮壤無歲時陰陽倏遷變觀化若等夷夏日
炎何早黃塵壓空苦熱惱冬日暝何遲霜威慄慄侵單裌
涼暄如流去飄忽轉眼芳華已銷歇咨寒怨暑亦何爲松

柏森森挺高節顏枯手皴未遑惜維願年年不離別綺紵
被體奚足歡邱壑藏身甯守拙君不見後有梁鴻前莫缺
江行雜感

挂帆忽千里小艇放中流碧月吳天夢青山楚客愁煙波
搖暝色佳節入孤舟無限滄桑感飄飄羨白鷗

寄懷孟緹姊京師

朝瞻出岫雲日暮不歸山昔我送君行一去會面難道路
旣阻修人事日益艱悠悠楚江遠渺渺燕雲寒撫茲五中
裂念往惻肺肝昔別十六載契闊意迴環相逢未經歲握
手不盡歡驅歌促遵道泣涕如沈瀾感姊視我厚霜鬢孩
提看助我撫孤兒辛勤答重泉如何捨我去寤寐無時安
寒煖莫我顧痾癢孰與言尺書千里來諄諄教愚頑洗心

滌煩慮銘此金石篇君如青松枝勁質含清妍我如拔心
草搖落愁霜天安得凌長風送我至君前相依共辰夕庶
慰遲暮年

署齋卉物詩

治亂有常理患氣百年結跳梁起羣凶蔓衍來百粵戰鬪
經五載行省三得失鋒鏑幸已遠黎庶思家室荒城關蒿
萊炊煙漸稠密官衙競修繕土木興不日此署亦告成樸
素屏丹漆中庭不盈畝草木紛羅列我來播遷餘及此芳
春節三歎感廢興殷憂有時畢

堂西餘隙地白骨掩榛荆開池貯流水畫地通溝塍閉門
學農圃寄意懷躬耕惜哉泉石志羈縻傷簪纓名山無靜
境波濤方沸騰一枝得巢柯聊慰達士情不見中澤鴻鵠

露色無間

幽蘭有高致質弱苦易零
芳香不可留滋樹徒勞形
小草時作花嫣紅間蔥青
閒階濯新雨綽態何娉娉
悅目非不怡所嗟乏奇馨
采之聊把玩慨彼服媚情
一笑謝東皇榮枯無定形

我昔侍宦游高槐蔭書屋
臨池日揮毫簡冊潤新綠
竭來武昌城綠槐有遺築
千年迹相合棲託亦云樂
頻年邁兵燹解舍成平陸
未知陶邱畔何人護喬木
浮踪此焉寄佳景欣可囑
惜無十丈陰深簷蔽炎旭
會當求嘉樹植向閑干曲

種蕉甫逾年蕉心已作花
濃苞擢齒莖亭亭迎日華
瓣開如巨蓮細果密相排
攢簇苦難展芳緒紛如麻
中含仙露

漿甘寒沁齒牙澀之潤詩心崖蜜美莫加柰何果方熟枯
樵及根荻清陰與大葉渺若飄煙霞悟彼造物心浮生信
有涯

水仙最高潔泉石雅相稱亭亭絕塵滓迴迴見情性惜哉
柔脆姿欲與歲寒競安能如老梅風骨冰雪勁賦形各殊
類鍾毓有定命飄飄列仙人菱形亦奚病真意託瑤琴揮
絃孰同聽

老樹何輪囷蚪枝偃欲僵柯葉雖不改寒暄已備嘗自矜
後凋性了不畏雪霜嚴寒苦相逼凜冽亦可傷春來發新
枝花開點輕黃紫芝燦三五擢秀含英光晚節聊足怡及
時願能償頽齡資服餌相與酬青陽

張紘英字若綺陽湖人琦四女諸生王曦室有鄰雲友

月之居集

寒月

天迴月初上沈煙一徑深
峭寒凝遠岫冷彩浸空林
籬竹舞清影江梅共素心
莫嫌風景異好爲洗塵襟

讀緯青姊遺藁

浮生若流水死別忽經年
淚眼驚秋早離魂有夢牽
鶴飛華表月花落夕陽天
此日西窗下空餘詠絮篇

張鳳慧字筠香永嘉人有留香閣詩存

枕流巖

拳石玲瓏薪作癩只宜高枕處
輕瀾白雲數尺籠殘夢
明月一牀聽急湍側耳清流聲
愈大滿身斜照夜將闌
鴛鴦文景饒君侈爭及東山卧謝安

石門訪劉文成讀書處

巖巖削立石門敞兩扇洞開高千丈停舟沿徑窮清幽坐
看飛瀑激波響恍疑仙境非人間不朽名山在天壤當年
披卷面流泉洗滌塵心恣清賞山水鍾靈豈偶然雷雨風
雲真氣象荒碑林立蔓草敷一代元勛風泱泱前度劉郎
今已往年年月照讀書幌夕陽欲暝歸扁舟梵磬一聲蕩
蘭漿

重登池上樓有感

謝客耽游地不步林麓古樹倚雲根飛泉出巖腹隔岸
舊山青崔巍聳積穀峯色青似染嵐光淨於沐月影沈寒
潭清光若可掬披榛尋古碣剝蘚暗摹讀憶昔題詩處迴
步認綠竹當年諸女伴搜奇相追逐陳跡須臾間躑躅剝

我獨俯仰足傷懷流光幸毋倏林鳥解留人一聲唬幽谷
殘花堆斷澗飛霞落孤鶩歸作卧游圖生綃裁半幅

烏石舟中夜坐

一路奇峯迴空明石不頑殷勤溪畔水流夢到東山

金蘭貞字紉芳嘉善人平湖王丙豐室有繡佛樓詩鈔

詩話紉芳父爲青田學官幼隨任學詩畫花鳥尤工
墨蘭秀韻獨絕適青士孝廉十載寡姑已七旬勤鉞
織以佐甘旨子才五齡教養成立其從弟眉生觀察
序其棄云我家祖姑文沙老人祖母聽秋老人以詩
畫名江鄉讀姊詩追念兩老人閨門唱和時余輩皆
在髮稚會幾何時而姊與余相顧老矣又謂姊隨宦
括蒼得山川之助名章秀句不下千言以兵燹遺佚
鈔存僅此足見一斑紉芳挽眉生詩有云空使霸才
殊小補非輕王道
在因時語頗渾括

吉芝樓杏花盛放

樓在青田
縣學署

小園一夜放春花姣態妍姿鬪彩霞正值曉妝簾幕捲萬

重紅雪擁窗紗

自金華登陸過桃花嶺

渺渺關河路承歡此一行水明奩鏡淨山遠黛眉橫度嶺
松濤送歸輿客雁迎風霜緣未歷日日計征程

桃花嶺投旅店

遙望沿山麓旗飄賣酒壚小橋雙磴滑野店一燈孤峭閣
臨崖下籃輿掛澗隅移時歌笑起云是郢中姝

丁酉秋歸自括蒼道經武林遂游西湖

吹來細軟晚風柔到處秋光招我游江上青峰湖上月替
儂掃盡別離愁

夜過南渡橋

地隸奉賢壬戌孟夏賊擾浦東蔓延鄉僻乘夜避泊浦中

指點申江路輕舟乘夜過一燈人語靜兩岸月明多到處

皆烽火潛行避網羅風聲疑草木數問夜如何

勞蓉君字鏡香浙江山陰人同縣陳錦室有綠雲山房

詩草

詩話鏡香幼卽能詩事母至孝每安排書冊飲具茶局求悅母意年二十有三歸陳晝卿觀察聯吟不輟嘗以三十自壽詩寄其兄佩蓀孝廉并書云今而知華墨非婦人事箕帚井曰凡職所當任者從此益努力佩蓀答之曰若是覺左芬太華而桓少君又太樸矣逾年歿李越縷題其遺集云泊澗社散風流歇又見名聞正始篇一夢繁華隨蝶化彩裙偏不解留倦注女史絕筆於胡蝶詩有貪戀繁華夢正賒句蓋識也語也

初至唐昌作柳絮吟呈越中老母

君不見灞橋之上楊柳枝蕩搖飛絮含丰姿可憐三月化
萍梗正是垂楊頭白時臨流相送悄無語忍使萍花自飛
舞白門倚望空惘然淚灑千絲萬絲雨此花本是楊枝生

高飛低舞何輕盈夕陽芳樹東流水無奈春風欲送行青
眼依依識行路猶逐西風向東顧天生弱質有所歸未許
本根久依附祇宜歸處便爲家徒羨園中干樹花花落猶
在花開處飛絮茫茫天一涯看他漂泊今何在近是比鄰
遠絕塞回思去國夢魂中相思未了三生債但得楊枝老
未衰春風安穩護樓臺明年海燕雙飛日銜取萍花枝上
來

聞南屏鐘天大雨霰

凍雲疊疊隱禪林霰墮空山漏欲沈萬點詩魂飛玉屑一
聲僂籟破塵心重添猩幕鏡光瘦小試螺杯酒味深莫道
三更寒入夢有人呵筆尙聯吟

數擬歸省不果睹夕陽有感

夕陽紅到柳梢頭何處歌傳故國愁歸計於今憑尺素相思勞我輒三秋環城空有桃花水喚渡難登竹葉舟剛擬回檣逢海警夷擾甬東夢魂常繞面山樓故園

憶龍山故居

傍小琅瑯塔影斜故居傍飛來峯亦曰小山樓空賸舊煙霞可憐曉起催妝烏猶認窗西鐵樹花

述夢

寂寂復寂寂夢境去來疾頃涉三千里不覺關山黑飄飄入庭闌怡怡語相接門外藤蘿紅窗前柳條碧諸阮猶垂髻二老髮增白七載依戀思一訴叅時日天雞喔喔鳴瞿然秋鏡側鄭人埋野鹿莊生化胡蝶此境本人間急追杳無迹悔我向夢中多費一回別攬衣起徘徊梅花印殘月

感懷

英雄何必皆逢時
陡然遇合猶嫌遲
凡鳥紛紛占芳樹
鳳凰安得梧桐枝
自撤茅廬近紅日
曩時花草休回憶
君不見春雷一聲
天地驚
么腐瑟縮莫敢出

憶舅家小園幼時所游

惆悵駒光一瞬中
蕪園卅載記游蹤
池邊魚影驚新月
竹外雞聲唱午風
繞砌苔枯霜點白
蓋檐楓老葉翻紅
而今王謝堂前燕
那識當年總角童

書感

客心與秋氣
顛顛古今同
天地朝昏候
人生聚散中
白雲親舍夢
黃葉寺樓鐘
極目寒煙裏
飛鳴三兩鴻

中秋雨

癡心呪雨未曾收，辜負天香一院浮。
雲幻波濤翻玉宇，風吹簫鼓隔瓊樓。
候蟲寒咽遲遲夜，落葉輕傳瑟瑟秋。
欲向九霄看月色，祇應欹枕夢皇州。

時二老在京邸

登隆山書院西樓

在唐昌治北

半空雲霧擁層樓，中有仙人駐遠眸。
千古圖書藏石室，萬家煙樹繞谿流。
新詩敢壓吳山會，健筆能扛浙海秋。
此地清高遠塵世，好從他日證瀛洲。

秋日卽事

西風蕭瑟薄窗紗，半角斜陽散綺霞。
瓦鼎煎茶拾紅葉，瓷瓶添水插黃花。
一樓鄉夢驚新雁，九月寒砧起暮鴉。
問我秋心向何處，乍歸於越又京華。

碧天晶晶欲霜時，香駐簾櫳捲更遲。
日薄江村收笈簪，風

摧木葉戰燕支悲秋嬾挹芙蓉粉遣酒新題橘柚詞最是
詩糧今歲熟重陽開過菊千枝

紫雲山途中

重尋歸徑紫峯西回首禪關路已迷出岫雲都隨足起衝
山日正及肩低谿橋斷處撐雙塔煙樹叢中卧一犁不有
阮孚千兩屐那能摩壁盡留題

最愛林皋路幾又貪看景色屢停車繞谿屋似魚鱗細截
道橋如雁齒斜山遠雲根疏著樹秋深霜葉豔成花淩空
極目增鄉思千里歸來羨暮鴉

小除夕作

雲珠灑地東風香梅花送客歸故鄉今年忽憶去年事梅
花與我同蒼茫歲闌檢點錦囊裏得詩三百聊自喜更有

一束長安書書中有語可慰予上言京華二老健餐飯

二老

在京年高頗健

下言中山諸女多文譽

佩兄攜二女官定州親課書史

窗榻新糊

設棐几鍼綫餘工置勿理清閒官舍貧不忙家在桃源萬
峯裏門前餘雪冷未消對我猶作花痕嬌寒山蒼翠睡欲
起早禽得日鳴連朝弱柳舒青古苔綠將棄熏籠就春服
君不見萬戶新桃換舊符黃童白叟爭歡呼元宵預約觀
鏡侶買取春光滿玉壺

春寒

春光寂寂思依依深院無人晝掩扉病質吟花紅亦瘦疏
簾引草綠爭肥綠慳骨月辜鄉夢愁老年華傍翠微酥雨
連朝寒不耐晚來催我更添衣

山窗卽景

山窗宜向百花開，好鳥催詩日日來。
誰爲含情刪不得，垂楊分綠護妝臺。

春朝常破繡工夫，筆硯安排與不孤。
怪底花枝慵過我，一簾香影倩風扶。

春暮

溼煙漠漠繡簾低，寒怯醅醲夢欲迷。
風雨漸多春漸老，滿城濃翠乳鶯啼。

夏日偶成

臨谿卜得三間屋，水光風影來廊北。
四圍紅藕掉扁舟，一階芳草眠馴鹿。
地少塵緣與世偏，樂有神僊豈我獨。
夜涼更埽松陰石，明月爲茵和霜宿。

長夏幽居戲效元人體得二律

長夏幽居興正賒石泉新汲自烹茶戲編小令書蕉葉乍
換輕衫襲藕花千里書來鐙欲語半山風墮竹先斜清涼
如此何愁暑吟到松陰健有加

動搖風影愛簾波石磴花階露氣多幾疊雲羅蒙澹月一
丸星火度明河飽聽竹籟兼泉籟遙答樵歌與權歌莫信
天邊牛女事披衣爭問夜如何

范薇字浣仙武昌人同縣梓潼知縣陳鯉女諸生黃孚

敬室光緒己丑進士浙江知縣大華母有浣仙詩草

詩話浣仙節孝事實見武昌縣志平生著作凡數萬
言夫亡取投諸火日命蹙如是殆造物有以忌之也
存詩數十首乃未病時自覺體衰口授其子者歿後
家中夏日曝書檢得翔鶴樓賦擬黃叔度碑文附自
記擬作原委數十
字今刻詩草後

息媯

兒女成行淚暗彈
故宮回首夕陽殘
楚王任有千金賞
祇買桃花笑曲闌

宮中夜景

博得君王寵羊車
去又來金爐香篆裊
玉闕漏聲催春色
桃腮妬秋波柳眼開
霓裳歌一曲明月上宮槐

睡燕

日午花關倦欲回
紅樓望去費疑猜
便從徑外銜香返
穩憩梁間待夢來
春暝畫堂人正靜
風過雕檻錦成堆
簾鉤斜挂眠方熟
不管芹泥落翠苔

睡蝶

亂紅深處戀芬芳
枝上蘼蘼夢正長
詎畏流鶯唬遠樹
祇驚午漏滴花房
雲環錦帳眠方穩
風促金鈴響不妨
一任

南園春似海香魂飛繞黑甜鄉

巖曩雲常熟人有拂水草堂詩鈔

詩話曩雲適胡氏早寡嗜吟詠耽清寂曾住西湖數年後於邑之拂水巖建屋數楹持齋禮佛年七十餘卒曾自營生曠種梅數百株鄉人稱爲梅花墳

山居雜詠

春風次第到空山雲本無心任往還路轉峯迴渾入畫
楊影裏有柴關

經卷生涯耐寂寥湘簾風動篆煙飄侍兒未解華嚴意閒
立松陰學弄簫

齊祥棣閩縣人河南知府鯤女陳兆熊聘室有玉尺山

樓遺藁

詩話祥棣生時其母夢人授以白蓮花及長工詩善奕許字陳氏未行夫卒有求昏者祥棣潛投所居玉

尺山房蓮花池以殉後陳氏迎柩合葬其墓適對蓮花峯生前有白蓮詩人謂詩識

簪花

間拈金剪出朱欄要揀名花髻上安桃萼太紅梨太白選香選色稱心難

望月

今夕是何夕當頭月皎然應知千里隔共此十分圓樹暖鳥初覺樓深人未眠前身誰與證清淨悟因緣

趙景淑字筠澗合肥人都司鵲棠女有延秋閣贖稟

詩話筠澗喜讀史嘗集古今名媛百數十人各爲小傳名曰壺史又有香奩雜考一卷所居妝閣書卷縱橫几榻皆徧其弟野航大令徵於吳門得唐孝女畫菊筠澗愛之取懸壁間遂以延秋名其閣末字卒詩有淡蓮之致附列野航小羅浮館全集

隨家大人乞歸留別東甌官舍

春光黯淡別離天
海燕依依劇可憐
臨發縑緇重檢點
莫教鴻爪落人前

爲愛梅花手自鋤
十年妝閣當詩廬
不知今夜寒窗月
又照何人夜讀書

甌江

甌江煙定浪初回
飽趁西風一棹開
十尺布帆懸未穩
青山斜壓短篷來

西湖泛月

臨湖一帶澹斜暉
向晚寒鴉倦不飛
明月一輪秋水碧
藕花香裏放船歸

偶成

落葉聲中夢不成
捲簾依舊曉寒輕
不知近日秋如許
只

覺遙山太瘦生

新霽

晨興啟碧窗仰面得新霽雲斂半天青遠山沐如髻宿鳥
梳溼翎飛鳴向天際花垂浥露濃池溼歸泉細忽聞清音
來歌聲互迢遞

早春

細雨微風漾柳絲不知春到幾多時窺簾燕子殷勤甚銜
得花泥入硯池

雨後山行

雨霽碧空淨林深透夕曛天開銷溼霧山斷束歸雲晚氣
清人骨奇峯隱雁羣待看明月上花影漾波紋

晚泊平望

落日余言四夕一
四
落帆野渡小橋橫古戍蟲聲夾岸清殘月半斜秋色遠鴛
湖微雨漏湖晴

舟過露筋祠

白芡紅蕖出水香一枝柔艣送輕航船頭瀉鷗忽飛起衝
破浪花入野塘

一葉扁舟趁好風水天空闊乍飛鴻篷窗閒坐恰無事細
數秋花兩岸紅

秋波始闊蓼花稀楓樹初丹秔稻肥舟過露筋祠欲暮水
煙深處正蚊飛

沈淮字少琴臨桂人宣化河南按察使唐咸仰室有清

馥齋詩草

詩話少琴先世本越人作詩瓣香隨園于歸後隨佐
之豫而晉而燕後又就養入蜀徧覽名山大川故胸

襟益擴在蜀年老猶與髫齡
女弟子結社吟詩唱和不輟

中秋玩月寄適唐氏姑母沈太夫人

慈顏睽隔幾經秋，秋月重圓萬象幽。
銀漢冲霄橫玉宇，金波炫彩射瓊樓。
遲來雁信頻遙盼，怕對蟾光照別愁。
翹羨膝前蘭桂繞，時薇卿春卿禹卿諸表弟均入翰苑姑母就養在都承歡猶憶比兒不

中秋玩月感懷寄夫子

閒庭月朗正當頭，對景徘徊憶舊游。
菡萏也愁蟾獨照，稻粱猶羨雁雙謀。
冰輪有耀臨疏牖，銀漢無聲轉畫樓。
天上若憐離別憾，團圓常似此宵留。

老健坡

山徑崔嵬不易行，扶搖直上風輕鞦。
關西望河千里一抔煙，雲絕頂生。

留別河東道署庭前新竹

綠竹猗猗手自栽，頻行不禁數徘徊。
殷勤惟向此君祝，留待兒孫日後來。

度佛耳巖

高峯層級似天梯，萬竹迴環好鳥啼。
一氣扶搖臨絕頂，舉頭猶覺白雲低。

懸巖絕壁樹樞杈，林隙遙窺日已斜。
隔著重巒聞犬吠，酒帘飄處有人家。

張恩詠字僊籙善化人同縣陳戊室有定香閣詩彙

游嶽麓

破曉涉秋江，秋江靜無瀾。
濛濛白雲冷，泛泛浮鷗閒。
隱約螺峯高，側影清波間。
輕舟盪雙槳，飛渡蘆荻灣。
薄霧散前

林行將叩巖關

盤旋石路曲窅窳青巖高遠聞清梵音古寺依巖巖攀藤
涉奇境木落風蕭蕭蒼蘚留鶴迹石泉瀉寒濤上有百尺
松龍從凌雲霄松花香不掃冷翠搖枝梢縹緲羽衣仙飛
空架長橋

晴霞蔽虛壁玉殿何穹隆層梯高百級飄搖互長虹飛樓
接雲漢一望天地空秋清遠峯秀葉落疎林紅湘帆片影
沒湘水一綫通江城渺不見隔岸浮嵐重孤原隱落日大
壑生涼風悠然與襟期願尋物外蹤

天低暮靄薄返照明村西芳洲采杜若枉渚舉留夷秋花
黃未開葉落靈均祠湘波流浩浩遺恨空悽悽白雲自往
還帝子降何時風裳與水珮縹緲不可期輕舟泛明月歸

客蒼煙迷江鷺如解意爭隨帆影飛

石梧舅氏別墅初成詩以誌之

平泉今再見市隱避塵譁小艇招明月危樓枕落霞圍蔬
畝露滴谿水夾隄斜寒意來朝減山桃已作花
落霞明夕照倒影定王臺清磬隔花遠霜鐘渡水來澗松
寒滴翠石筍潤生苔生計誰相問疏狂畢卓杯

芋園卽席贈幼梅童子

江城對面青崔嵬羣峯一一隨城來名園花柳競奪秀池
光映日波灩澗豪竹哀絲最激越主人愛客清樽開公子
翩翩乃雛鳳新詩示我何纍纍卻看華藻集毫素有如肺
腑藏瓊瑰卽今世故多喪亂俯仰古今縈襟懷紅羊浩劫
經十載餘生獲免亦幸哉汝當努力惜佳日譬之種樹宜

灌培春華秋實成大器廟堂待取梁棟材

李儼煥字陶吟河間人武安霍州知州白昶繼室有劍

芝閣詩鈔劍芝閣詩鈔續選

詩話陶吟七歲學詩有驚人語閱十年徧讀全史旁及術數醫學靡不通曉詩多超逸之作兼工倚聲藁內附律賦試帖皆合法度短札亦有風致

步虛詞

夜靜長吟金蕊篇已通妙悟未通玄誰知猶結飛霞佩閒

向雲中響玉鞭

瑤臺宴罷碧雲寒笑向長風跨紫鸞醉後不須吹玉笛且
登蓬島聽飛湍

戊寅九月記異

重陽將近溼雲遮朔雪淒風戰齒牙半夜畫檐敲玉柱五

更庭樹散瓊花高才詠絮知何處敗興催租定幾家瘦菊
蕭疎芳景寂清香一瓣讀南華

讀史

嬾向明光折桂柯肯隨小隱入巖阿狂奴故態猶難改烈
士雄心自不磨玉具拄頤聊痛飲錦囊負背漫吟哦海山
要是移情者圖史其如勵志何

夢中作

從來志士易悲秋駕鶴眞爲汗漫游醉上崑崙山頂望蒼
煙九點是齊州

去鄂行

宦游屢遷徒別意坐超忽三載此安居一旦成分隔草木
有殊芳樓閣多清絕飛梯接望中崎嶇如九折愛山心未

至竟未探雲穴拍徧畫闌干此心以何熱但去勿復辭徒
使離思切舊袂登輕輿攬轡慕古傑出城日已暮月色忽
爽澈金鐸振喧闐流澌響清咽干巖如拱揖似惜怱怱別
我行信悠悠多情愧岑薛他日儻再來清暉爲娛悅

我行亦云勞况值歲將闌北風何獵獵慷慨歌路難山高
林木黑野闊星斗寒重裘亦不暝游子憎衣單火明至旅
店解裝治晚餐豆粥咄嗟辦幸博慈顏歡茅柴亦難得莫
作新豐看明發遵前途曉氣清漫漫霜威在何許但見楓
林丹嵐光畫遙碧人影晃冰湍巖深虎豹嗥天迴雲氣團
陰晴及朝暮所見非一端關山信修阻引領起長歎

述懷

胸中崢嶸千仞山眼前寥廓百道泉光芒直徹萬古上與

酣攜卷叫紫煙箕倨嫚罵吾不取蘇子亦說劉伶顛名士
但當痛飲耳此語便已虧天全望之不鄙士行正詩豪酒
聖空稱賢邇來慷慨動君子願謁蘭陵舞秋水平生意氣
今幾何玉具挂頤聊爾爾達人清節貴磨礪精金詎受纖
塵滓後者瓦礫前秕糠文士相輕盡如此憤極冲天欲一
鳴畏人嗔怒還須已

中秋陰雨用東坡先生韻

瓊樓岑崑接天高中有仙人濡吟毫煙雲落紙雜風雨方
塘漱灩生波濤聞說天台落桂子故應縹緲隨流水天香
雲外竟誰傳空階夜滴涼音起世事猶來似走丸珠宮幾
見瑞光蟠好憑玉笛吹深處試擲虹橋入廣寒漳水悠悠
近清汴古風逸事今多變倩句空留碧玉箋雅詞誰唱紅

牙板金飄蕭蕭合空山雲影雖沈那得堅自捲湘簾拜蟾
魄更留絃管夜深看每惜陰晴不長好掩卻秋光太草草
窈窕佳月難屢逢此語吾聞自坡老錦繡羅胸未是貧筵
前棣萼亦詩人松花酒熟莫輕出舉盞惟邀修月客

雪後登隣霄臺

北臺縱眺意茫然嘗怪冰泥沁錦斑萬瓦寒生晴雪裏一
峯獨秀亂雲間遲留歲暮衙齋冷灑落生平笑語閒試倚
危欄望天際神游勿穆勝驂鸞

交橫寺遇雨

山中一雨葛衣涼斜插蓮花倦晚妝地儉不知康歲樂民
貧惟識野蔬香著書玩世真何益采藥怡情計亦良遙望
前村半扉水數家煙火入微茫

望太行山

太行天下脊形勝孰能齊一綫盤空上三霄入望低雜花
薰巘嶸怪石碎輪躡千古孫陽顧何人解駿嘶

紀夢

澹泊夙所安齊物得宗旨旣長習勤勞晝作夜乃止頽然
適天放杳不知所以叩門誰氏園靈鏡殊栗里野舍牽薜
蘿林木森可喜雲開淡淡山日漾溶溶水褰裳涉澗濱延
芳采蘭芷響泉橫絕巘斑斑土花紫揮手一再行天籟縈
吾指廣陵不世傳叔夜信非美棄置勿重彈恐使音盈耳
次律悟前生那須閒故紙人生亦有涯世事何窮已早知
蝶是周不待蘧然矣

殘杏花

一枝瘦影不勝簪誰見繁英落玉樽寂寂香階紅不掃澹
煙斜月怨黃昏

夜坐

豪氣消除百慮空靜聞蟲語度簾櫳太虛不礙纖雲滓笑
煞秋花媚晚風

勵志

弱齡授詩書鑽研忘早晏旣長讀文史篇帙苦浩瀚傍搜
及百家茫乎若河漢邇來二十年奧義時一見欣然欲起
舞得失已過半聖人垂著述游夏終莫贊豈余庸陋姿所
得望津岸偃鼠走飲河未動腹已滿蚍蜉不自量乃欲抱
樹撼掩卷發深思浩然起長歎

感遇

昔有交讓樹蒙龍蔭干章蟠根日鬱結綠葉何芬芳下有麋鹿游上有鸞鶴翔貞石生其隈廉泉出其傍高風邁千古令譽安可望誰知逢匠石一旦遭斧斲零枝作器玩大本充棟梁鏤金復錯彩奉君白玉堂自謂盡材任豈識非其常修名仍遇侮掩抑徒自傷

暮春獨行後園遙見垣外白海棠盛開

山城春晚風雨惡沈沈寶篆縈珠箔紗窗獨坐苦無聊悄下香階望遙嶠舉頭恰見一樹花亭亭玉立臨風斜珠苞翠葉互掩映苔垣蕪院深深遮卻恨土人不知貴忍令暮雨朝煙憤安得移歸繡闥傍日日花前爲一醉乍覩應同拱璧珍絲絲柔萼絕纖塵沈香濃豔知難並定惠清超恐未真華月籠光轉林麓灩灩寒波浸明玉天然素體淡丰

容千古幽蘭秀空谷珍重名芳好自將冰肌玉骨祕幽香
荒園盡日安荆棘肯學嫣紅薄媚妝猶憶長平舊時見藥
欄東畔開清醪猩紅帶露曉霞明酒醒夢回人已倦桃李
無言杏已霏綠陰青子送春歸可憐滿樹玲瓏雪獨抱清
芬隱翠微徘徊曲徑情何已繁枝折得蕚盈几胸中華靡
久不紛豈借煙波濯紈綺刻意惜花我亦癡每逢佳卉便
題詩留連一物眞成過不及黃州夢醒時

夏夜雨霽

珊鉤蕩漾織簾紋陡覺羅紈膩麝芬凍雨乍晴庭翠活浮
煙散盡月華分護屏蕙炷通宵馥喧枕濤聲徹曉聞誰向
空山賞寥廓翩翩仙袂思凌雲

縱筆書懷

比月集言目卷一 下 一
四七
憶從總角事篇章坐擁書城樂未央磨盾才雄空激烈雕
蟲技小愛論量側身便欲無前古披髮真思下大荒俯視
萬殊同一芥迢迢天路恣翱翔

廿年辛苦竟何成幾見含毫氣吐虹出水芙蓉方煥若凌
霄雲鶴得無同逞才枉詡屠龍技鍛句真如刻楮功卻悔
安心猶未竟冷然我欲御長風

靜坐

閒來惟靜坐未覺戰紛華紈綺習俱盡雲山志未賒名心
淡秋水清夢到梅花處處皆佳境吾生亦有涯

山居聽雨

向晚關門卧紗幘聽雨眠秋聲起林薄涼意答山泉靜許
詩情得清教俗慮捐至人何處夢吾思本超然

閱舊作

總角耽文翰篇章每自娛只疑多砒玉豈望得驪珠楊子
悲歧路莊生戒畏途廿年塵土夢展卷一長吁

曉行南礪

水暝沙平浪不生遠山一抹畫難成黏天芳樹青如薺時
有幽禽自在鳴

不寐

暝色入閨闈小窗幽更清涼風漸以厲落葉交縱橫攬衣
下庭除仰視霜月明孤光耿雲表山骨瘦崢嶸濃翠遽如
此節物令我驚歸來倚案立嗒然忘其生中心無適莫勿
勿非所營蓬壺遠莫致濁骨終難輕兜率在何處吾欲從
之行二者無一得翻然辭瑤京亮維朝市隱豈顧俗慮縈

推遷有至理氣象能移情秋光雖足悲春色行自榮誰憐
不寐者竟夕和蛩鳴

咫圍賞雨

霖雨暗朝日霏空綺不如林花穠欲滴池藻聚還舒拔地
憐新竹騰波羨大魚爲霖應自此聊復惜三餘

春日登嶺山

茲晨心志怡言矚芳華景繡甸扇微風春巖淩倒影欣欣
灌木榮澹澹晴川靜水暝白蘋香露浥紅蕖靚鷺鷥甚閒
暇迴立沙隄永幽人自往來賞徧塵凡境暮色下林端雲
霞滿遙嶺

孟夏卽景同佩青妹作

羅衫新試水沈薰閒凭雕欄對此君曉日亂明蓮葉露和

風輕颺柳花雲魚游宛轉涵生趣鳥嘯清圓入靜聞自笑
年來忙底事惟將辭采策殊勦

午窗苦熱偶與三妹話及昨宵夢境詩以記之

溽暑煩襟困鬱蒸揮毫落紙賦憎蠅窗中列岫清如洗便
擬移居最上層富貴逼人何日了飄茵落溷徒紛擾況我
身居華屋中雕欄紫閣如蓬島一望雲霞一慨然平生山
水有深緣卻思昨夜清涼夢直到匡廬看瀑泉仙音泠泠
供洗耳滌塵正要聰明水一條白練玉龍飛千古常新誰
得擬長風浩浩襲衣輕遙指天邊桂月明萬頃玻璃身一
葉人間何事更關情青雲冉冉隨風漾遽然一覺驚綃帳
羅衾展轉不成眠恍忽猶疑行霧上煙消日出霽霞生鳥
語花間報早晴夢寐閒思何足憶會當鼓翼指霄程

夢登華山書所見

天風襲衣袂高坐華山頂皓月墜林巒涵空水荇影
山開成獨往霞嶠瑩心目投書別家人不作昌黎哭

閱邸報偶成

不肯因人熱其如愛晚涼魂清無夢寐齒冷到巖廊破浪
心情嬾看雲意興長此邦真樂土何暇計炎荒

聞某相罷歸

十年春夢醒黃扉高蹈東山願不違萬里清光新送爽一
庭秋影澹相依閒支石鼎評茶品淨掃松陰待鶴歸名遂
身閒有如此肯將簪黻易荷衣

立春後三日試筆

簾垂晝永覺春融硯釋輕冰暈碧泓晴旭半窗香篆燼水

仙花底寫蘭亭

花朝早書畢以餘瀋作墨花一枝

風風雨雨到花朝沈水香清閉綺寮
仿得蘭亭墨華潤更將芳意寫生綃

黃崖曉發

辨色嚴妝竟登輿破曉行麥苗纔覆雉柳葉未藏鶯
小雨沾衣潤柔風拂面輕山靈應笑我何事日長征

午至芹泉驛見黃菊盛開有感

辭親遠行邁所適天一方脂車戒前途陟彼千仞岡
清風來禾黍蕉葛生微涼憶昔別君初桃李繁穠芳
如何三月後遂見黃花香采采不盈掬悵然中心藏
手把珊瑚枝身襲芙蓉裳清節亮可貴不佩庸何傷
人生有臧否此心任

低昂仰視碧天末矯矯鴻鵠翔

秋夕望月和張曲江韻

暑退纔三日蟾光迥不同炎威散林薄秋意滿庭中
圍籬滋涼露池蓮墮曉風澄清徒有願常恐壯圖空

予性耽文翰坐是致疾者屢矣書以自解

重裘坐擁尙憎寒羸弱真堪仿士安不爲讀書耽雅趣那
能與病結清歡妄心已逐風雲散素志終期宇宙寬香
風因何日覺庭前柏子任君看

立春日試筆

綺歲何遑駛光景如奔輪迴息三十載所見無一眞綠鬢
漸以華朱顏日以陳塵務未能遣愧彼賢達人東風吹戶
牖萬象皆呈新繁花吐芳樹玉沼游錦鱗欣欣物向榮我

生益自珍冰炭勿相戰爲樂須及晨何當屏百慮一賞郊
原春

古意

藝蘭那計畹一一春風前芳枝抱貞素翠葉何鮮妍幽芬
不及遠空谷誰能傳乃知璠璵質不遇終相捐馨香雖自
好賚蒙世方賢對此坐歎息中心爲悃悃

翁端恩字璇華常熟人文端公文恭公女兒歸安國

子監祭酒錢振倫繼室有簪花閣詩鈔

單受茲曰夫人爲士釐伯姑昔年先舅命士釐題簪
花閣集曾遵擬四絕句刊時載入帙末展卷慙然又
伯姑別有館名綠莊嚴道光癸卯阮文達書額故名
綠莊嚴館集額已久失先舅官京師時從海王村購
歸至今珍
藏家中

金鼈玉竦觀荷

澄波曲繞鳳池通萬頃夫渠映日紅繡幃塵催花外路珠
欄香浸水邊風魚游細浪紋初活鶯轉深林語漸融太華
峯頭蓮十丈霞標雲錦總相同

夜渡鄱陽湖

黃蘆瑟瑟送扁舟千里江天一葉浮山影忽隨雲氣湧浪
花寒迸月光流宮亭接食傳神鳥沙渚隨波浴野鷗此際
篷窗舒遠眺匡廬真面已全收

送玉甫兄叔平弟偕絳卿姪應試金陵

雁影涵秋趁曉風壯游難得一門同已欣佳句如靈運更
喜清談有阿戎萬里江濤歸賦筆六朝山色入詩筒攀香
蟾窟家聲舊會看三株燦月中

長至日書懷

又見葭灰飛玉琯深宵擁被對孤燈青春漸逐尊前改白
髮多從鏡裏增苦盼音書憐女遠欣看家學有兒承平生
愧乏螽斯化揮盡黃金尙未能

仲淵姪臚唱第一悲喜交集詩以卻寄

一紙泥金乍到門開顏翻使淚添痕更無憑藉通天路卻
道滋榮並宿根哀樂雜乘真夢幻升沈不次總君恩卻看
雛鳳高飛處苦向樊籠憶哲昆

晚晴簃詩匯卷一百八十七終